



12.10.2022

UKA2022/128

Paneeraq Olsen, Naleraq

Kalaallit Nunaanni meeqqat pillugit inatsisip Kalaallit Nunaannut atuutilersinnissaanut peqqussutissatut missingiummut aamma meeqqat pilersorneqarnerat il. il. pillugu inatsisip Kalaallit Nunaannut atuutilersinnissaanut peqqussutissatut missingiummut Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.
(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

Siullermeerneqarnera:

Naleqqaminngaaniit nuannaarutigaarput tulluusimaarutigalugulu meeqqat pillugit inatsisip aammalu meeqqat pilersorneqarnerat il.il. pillugit inatsisip nutarterneqarnissaat patajaallisarneqarnissaallu siunertaralugit Naalakkersuisut Inatsisartunut aalajangiiffigisassatut siunnersuuteqarmat.

Allannguutitut siunnersuutit meeqqamut angajoqqaanullu annertuumik sunniuteqartussat nuannaarutigaarput oqalliseqataaffigalugu aalajangeeqataaffigisinnaagatsigut.

Allannguutit pingaanersaasa ilaagaat ataataanermut tungatillugu angajoqqaat katissimasut angajoqqaallu katissimangitsut meeraasa naligiitinneqarmata, taamaalini meeqqamut tunngatillugu taagutit imaalerput "aappariit meeraat" oqaaserlu "uersagaq/uersakkat" atorunnaarsinneqarlutik. Ullutsinni inuusuttut immaqqa oqaaseq "uersagaq" sunaanersoq ilisimangilaat uagulli 1960-ikkunni meeraasugut, inersimasut meeqqallumi akerartuutitut meeqqanut ataataminnik najorneqanngitsunut atoraat tusaasarpagut nikassaarpaluttumik nipeqarlutik nilliasut "uersagaq". Tamanna qamuuna annernartaqaaq ilaqtatagut meeraqatigullu taamatut pineqaraangata tusaalugit. Qujanartumillu oqaatsit tamakua atorunnaarnikummata inatsisitigullu atorunnaarsinneqarlutik. Inatsisiliortuusugut uagut qulakkiigassaraarput meerartatta tamarnik kissaatigineqarlutillu naligiittut inatsisitigut ulluinnarnilu inuunitsinni malugitisallugit, apeqqutaatinnagu ilaqtariiusutsikkut inissisimaffiat.



Taamaatumik Naleqqamiit nuannaarutigearput meeqqat tamarmik naligiimmik inatsisitigut aamma pineqalermata meeqqammi nammineq aalajangerneq ajorpaa kikkut angajoqqaarissanerlugit.

Ataatassarsiorneq eqaannerusumik pisariinnerusumillu ingerlanneqartarlernissaa aammalu angut anaanaasup naartulernerata nalaani atoqateqarsimasup piumasarisinnaanngorpaa meeqqamut ataatanini misissorneqassasoq. Siornatigut anaanaasup meeqqaminut kina ataatanersoq pisinnaatitaaffigaa oqaatigerusunngikkuniuk oqaatigissanagu tamannali atorunnaassaaq. Tamanna ataataasumut minnerunngitsumillu meeqqamut annertuumik toqqissiallannassaaq paasillugu kina ataataginerlugu.

Ullumikkut ilaqutareeriaatsimut naleqqussarneq Naleqqamit nuannaarutigaarput ilalerluinnarlugulu, tassa inatsisikkut ugguuna suaiaqatigiit arnat marluk aappariit pisinnaatitaaffeqarlermata aappaasq anaanaaqataasinnaanngorluni. Taakkua meerataarnissamut isumaqatigiissuteqarsinnaanngorput, arnarlu aappaasq naartunanilu ernisuunngitsoq meeqqamut anaanaaqataalersinnaanngorpoq. ”Anaanaaqataaneq ataataanerup assinganik inatsitaqassaaq. Anaanaaqataaneq ataataanerup assinganik inatsiseqartitaassaaq, aammalu ataataanertulli pilersinneqassalluni. Taamatuttaaq anaanaasumut, arnaatimi aammalu ilisarisisamaat taanna anisuumik tunniussisoq isumaqatigiissuteqarfigissallugu meeqqamut ataataasutut nalunaarsorneqarnissaanik.”

Taamaattorli ataataaqataasumut inatsit suli atuutinngimmat kissaatiginarpoq ataataaqataasumut inatsisitigut tunngavissat piaartumik suliarineqarumaartut, taamaasillutik angutit aappariit allatuulli aamma pisinnaatitaaffeqarlissammata.

Meeqqanut akiliutit angajoqqaat aningaasaqarnikkut atugaat eqqarsaatiginagit aalangerneqartalissasut inatsimmi allannguutaavoq. Aammalu meeqqat pilersorneqarneri pillugu angajoqqaat tamarmik immikkut meeqqamik pilersorneqarnissaannut pisussaaffeqarput. Tamannali angajoqqaamit naammassineqarsinnaangikkaangat kommunit aningaasaliisarnera kommunit aningaaqarniarnerannut annertuumik unammillernartuusarpoq. Taamaatumik Naleqqaminngaaniit taarusupparput ullumikkut kommunit aningaasaqarnikkut annertuumik meeqqanut akilersuutinut akiitsut nammatarimmatigit.



Naleraq

Inatsisip uuma allanngortinneranut ilanngullugu aamma eqqartorneqartariaqartutut ilanngukkusupparput meeqqanut akiliutit Namminersorlutik Oqartussanit tiguneqassasut soorlu Qallunaat Nunaani tamanna Naalagaaffimmit tigummineqartoq kommuniniigani.

Inatsisassatut allannguutitut siunnersuutit itisilerlugit ataatsimiititaliami oqaluuserinissaanut Isu-maliutissiissutuliornissamullu Naleqqamiit qilanaarluta piumassuseqarlutalu peqqissaartumik suliarinissaanut peqataassaagut.

Taamatut oqaaseqarlunga Naleqqamiit suliap ataatsimiititaliamut susassaartumut ingerlatinnissaa kissaatigaarput.